

En mira: Il pli grond parc natural en las Alps

■ (rtr/fmr) **L'entschatta mars 2021 decidan las diesch vischnancas en il Partenz davart il parc internaziunal Rätikon. Tar in gea duess il parc natural vegnir realisà a partir dal 2022, scriva la Regiun Partenz/Tavau.** Il parc natural Rätikon cumpigliass parts dal Grischun, il Vorarlberg ed il Principadi da Liechtenstein.

L'atun 2019 han las vischnancas dà l'incumbensa per in plan da management, quel pon ins cumparegliar cun in plan da construcziun detaglià. Quel vegn preschentà la fin settember a las vischnancas. Silsunter decida la popolaiziun sch'il parc internaziunal Rätikon po vegnir realisà en il Partenz u betg.

Mintga vischnanca decida sezza

Il proceder da votaziun è il suandant: Sch'ina vischnanca decida per in gea, lura è ses territori part dal parc natural, tar in na betg. Uschia na po ina vischnanca betg decider suletta davart il futur da l'entir project u maiorisar in'otra vischnanca. Il resultat total n'è betg relevant. Uschia descriva la Regiun Partenz/Tavau en sia comunicaziun.

Suenter las decisiuns a nivel communal – enfin il mars 2021 – dovria quai il consentiment chantunal e federal. Sche tut va tenor plan vegn il parc da natira realisà l'emprim per trais onns. Sch'i duai dar in manaschi a lunga vista, lura ston las vischnancas anc ina giada decider.

Surfatscha da 1100 meters quadrat

Tenor la comunicaziun da la Regiun Partenz/Tavau muntan ils custs per ils emprims trais onns ad in milliun francs e silsunter ad 1,5 milliuns francs. Dus terzs da quels custs duain surpigliar il chantun e la Confederaziun. Las vischnancas na stoppian betg quintar cun dapli expensas cunquai ch'il parc da natira surpiglia lavurs che gajan uss sur il Turissem Partenz u sur la regiun.

Diesch vischnancas en il Partenz, tuttas 11 vischnancas en il Principadi da Liechtenstein e nov vischnancas en il Vorarlberg sa participeschan al project. Sche tuttas èn la finala da la partida avess il parc natural internaziunal ina surfatscha da 1100 meters quadrat e fiss il pli grond parc natural en las Alps.



En il territori tranter il Partenz, il Principadi da Liechtenstein ed il Vorarlberg duessi dar il pli grond parc natural en las Alps.